

胎熱第一

茅先生：小兒生下二七日，有中胎熱候，遍身黃膽腫滿，眼不開，作呻吟聲。此候本因母受胎時，身體不安而服藥，牙兒在胎中受毒藥，至有此候。所治者，先以紫龍水，一日三次洗牙兒；然用牛黃膏奶上吮下(方見膈熱門中，)一日下四服。如此調理，三日愈。如見肚膨、身黃腫不退，握拳、眼視不治。(紫龍水方無。)

錢乙論胎膽云：小兒生下肌肉濃，遍身血色紅；盈月以後漸肌瘦，目白睛粉紅色，五心熱，大便難，時時生涎，浴體法主之。又云：胎怯者，生下面色無精光，肌肉薄，大便白水，身無血色，時時哽氣，多嘔，目無精彩，當浴體法主之。又云：胎熱，則生下有血氣，時叫哭，身壯熱如淡茶色，目赤，大便赤黃，糞稠，急食乳，浴體法主之。更別父母肥瘦，肥不可生瘦，瘦不可生肥也。(浴體法見搖擲門中。)

茅先生小兒中胎熱歌：

孩兒生下中胎熱，面臉口鼻悉皆黃。此是血殂須細審，忽然著病見危亡。

《靈苑》**銀液丹** 治大人、小兒一切諸風諸癩，手足拘急，眼目不定，心煩吐逆。兼治小兒胎熱，攻注脾胃，面色多變；水瀉、涎滯，並皆治之。

黑鉛(半斤，煉十遍，秤取三兩，再於鍋內熔成汁，水銀三兩投入汁中，結作砂子，分為數塊，用絹袋子盛，以甘草水煮半日，候冷細研) 天南星(三分，為末) 膩粉(一分) 朱砂(半兩，細研) 鐵粉(將水飛過，候乾，秤三兩用)

上五味，同一處研勻，以麵糊為丸如綠豆大。每服五丸，用薄荷蜜湯下，不計時候。大人丸如梧桐子大，薑湯下，吃後微利為妙。

《萬全方》治小兒胎熱，心臟氣壅，煩熱驚悸。**朱砂丸**

通明朱砂 龍膽(去苗) 黃連(各半兩) 鉛霜(研入) 鐵粉(細研。各一分) 牛黃(細研，一錢) 上件為細末，都研令勻，以粟米飯和丸如綠豆大。每服五丸，以薄荷蜜水送下。量兒大小加減。

膈熱第二

(亦名壅熱)

太醫局 **涼膈散** 治大人、小兒腑臟積熱，煩躁多渴，面熱頭昏，唇焦咽燥，舌腫喉閉，目赤，鼻頰頰結硬，口舌生瘡，痰實不利，涕唾稠粘，睡臥不安，譫語狂妄，腸胃燥澀，便溺秘結，一切風壅膈熱，並宜服之。

川大黃(銼) 朴硝 甘草(。各二十兩) 山梔子仁 薄荷(去土用葉) 黃芩(各十兩) 連翹(二斤半) 上為末。每服二錢，水一盞，入竹葉七片，蜜少許，同煎至七分，去滓，食後溫服。小兒可服半錢，更隨歲數加減服之，得利下住服。

太醫局 龍石散 治大人、小兒上膈壅熱，口舌生瘡，咽噎腫塞，疼痛妨悶。每用少許摻貼患處，咽津。小兒瘡疹毒瓦斯攻口齒，先用五福化毒丹掃，後用此藥摻貼，立效。

朱砂(飛，研，二兩) 生腦子(研，一分) 寒水石(燒通赤，二斤) 上為末。每日五、七次用，夜臥摻貼妙。

太醫局牛黃涼膈丸 治風壅痰實，蘊積不散，頭痛面赤，心煩潮躁，痰涎壅塞，咽膈不利，精神恍惚，睡臥不安，口乾多渴，唇焦咽痛，頰頰赤腫，口舌生瘡。

牛黃(一兩一分，研) 甘草(十兩，銼，) 寒水石粉 牙硝(枯過，細研) 石膏(細研。各二十兩) 紫石英(細研水飛) 腦麝(研。各五兩) 牛膽製天南星(七兩半) 上為末，煉蜜為丸。每兩作三十丸。每服一丸，溫薄荷人參湯嚼下，食後服。小兒常服半丸，治急驚一丸，並用薄荷水化下。

太醫局 甘露丸 治大人、小兒風壅痰熱，心膈煩躁，夜臥不安，譫語狂妄；目赤鼻衄，口燥咽乾。療中暑解熱毒方。

寒水石粉(二斤) 馬牙硝(枯過，三兩) 甘草(炙，銼，一兩) 鉛白霜 龍腦(各三分) 上為細末，用糯米粉為糊，丸如彈子大。每服用生薑蜜水磨下半丸，新汲水亦得。小兒一丸分五服，食後。

太醫局 朱砂丸 鎮心神、化痰涎、利咽膈、止煩渴方。

朱砂(飛研，五十兩) 寒水石(燒通赤，研，四兩) 腦子(研) 牙硝(枯研。各一兩) 梅花腦子 麝香(各研半兩) 硼砂(一分，研) 甘草(五斤，浸汁熬成膏子) 上研勻，用甘草膏和。每兩作一百丸，每服一丸，含化。小兒夜多驚啼，薄荷水化下一丸。

茅先生小兒牛黃膏 治膈熱及諸熱，鎮心解毒方。

川鬱金(半兩，用皂角三寸，巴豆七粒，水一碗，銚白煮乾，不用皂角、巴豆) 馬牙硝 甘草(炙。各半兩) 朱砂(一錢) 硼砂 寒水石(各一分) 腦麝(隨意入) 上件為末，煉蜜為膏。許大。每服一丸，麥門冬熟水化下。

《良方》解暴熱、化涎、涼膈、清頭目。龍膽丸

草龍膽 白礬(燒沸定。各四兩) 天南星 半夏(各二兩半，水浸，切作片，用漿水、雪水中拌，同煮三五沸，焙乾取。各秤二兩)

上為末，麵糊為丸梧桐子大。每服三十丸，臘茶清下，食後臨臥。麵糊須極稀，如濃漿可也。應痰壅膈熱、頭目昏重，服之頓清。嶺南瘴毒，才覺意思昏悶，速服便解。咽喉腫痛，口舌生瘡，凡上壅熱涎諸証，悉可服。小兒尤食。

《張氏家傳》龍腦飲 治小兒上膈壅熱，目赤多淚方。

川鬱金(半兩，炮) 牙硝(一兩，別研) 肉桂(生) 甘草(炙) 白蒺藜(炒，去皮。各一分)
上件五味為末。用薄荷蜜水調下半錢或一字。量兒大小加減，食後臨臥，日進三、二服。

《莊氏家傳》初夏上焦壅熱方。

鉤藤 紫河車 白芍藥(等分)
上為粗末。每一錢，水六分煎至四分，去滓，冷服夜臥。

《莊氏家傳》老張萬回小兒方，洗心經，退膈熱。牛黃散子

牛黃(一分) 胡黃連(三兩) 大黃(一兩半) 甘草(炙) 犀角(末。各半兩)
上為末。每服半錢、一字，薄荷溫水調下。

《莊氏家傳》小兒鎮心涼膈。朱砂膏方

朱砂 甘草(各半錢) 龍腦(半分) 人參(一分)
上件搗為末，滴水為丸如此○大。每服一丸，用薄荷湯或竹葉湯調下。

《王氏手集》生金散 治膈熱方。

寒水石(半兩，生) 甘草(二兩，炙) 鬱金(三分) 乾山藥(一兩)
上為細末。每服半錢至一錢，生薑薄荷湯化下，食後。

《朱氏家傳》涼心臟，治膈熱方。

草龍膽 甘草(炙) 鉛白霜 白礬 白藥子(各等分)
上件為末。每服半錢，蜜水調下。

《朱氏家傳》治小兒心肺壅熱，唇口澀，面赤口乾，驚熱，大小便不利。四時飲子

山梔子仁 甘草(炙) 芍藥 大黃(煨。各等分)
上件為粗散。每服三錢，水一盞半煎至一盞，澄清，溫服，作二服。

長沙醫者丁時發傳天竺黃散 治小兒上焦熱，煩躁方。

天竺黃 甘草(炙) 朱砂(研) 雄黃(研) 白附子 全蠍 輕粉 鬱金(皂角水煮，焙乾。各一分) 牙硝
(半兩) 腦麝(各少許)
上為末。每服半錢，薄荷湯調下。蜜丸亦得。

胃熱第三

(脾熱附)

《巢氏病源》小兒胃中有熱候：小兒血氣俱盛者，則臟腑皆實，故胃中生熱。其狀大便則黃，四肢溫壯，翕然體熱。

錢乙論：弄舌者，脾臟微熱，令舌絡微緊，時時舒舌。治之勿用冷藥及下之，當少與瀉黃散漸服之（方見本門。）亦或飲水，醫疑為熱，必冷藥下之者，非也。飲水者，脾胃虛，津液少也。又加面黃肌瘦，五心煩熱，即為疳瘦，宜胡黃連丸輩（胡黃連丸方見病後虛羸門中。）大病未已，用藥弄舌者凶。

《嬰童寶鑑》小兒胃熱歌：

胃熱皆因氣血強，四肢溫壯小便黃，表裡熱時煩躁甚，渴多身體恰如湯。

《聖惠》治小兒胃中熱，心腹煩悶，不欲乳食。麥門冬散方

麥門冬（去心，焙）赤茯苓 黃芩 茅根（銼）甘草（炙微赤，銼。以上各半兩）蘆根（二分，銼）犀角（屑，一分）

上件藥搗，粗羅為散。每服一錢，以水一小盞，入竹葉七片，煎至五分，去滓。不計時候，量兒大小，分減溫服。

《聖惠》治小兒胃中熱，煩悶，不欲乳食，身體黃，多渴。栝萸散方

栝萸 蘆根（銼）柴胡（去苗）黃芩（各三分）川大黃（炒）甘草（炙）川芒硝 麥門冬（去心，焙）石膏（各半兩）

上件藥搗，粗羅為散。每服一錢，以水一小盞煎至五分，去滓溫服。更量兒大小以意加減。

《聖惠》治小兒胃中熱，煩悶不食。蘆根散方

蘆根（銼）茅根 赤茯苓 黃芩 麥門冬（去心，焙）甘草（炙微赤，銼。以上各半兩）

上件藥搗，粗羅為散。每服一錢，以水一小盞，入小麥五十粒、糯米五十粒、生薑少許，煎至五分，去滓。量兒大小以意加減，溫服。

《聖惠》治小兒胃中熱，日漸肌瘦。梔子仁散方

梔子仁 甘草（炙）黃連（去鬚）黃芩（以上各半兩）

上件藥搗，粗羅為散。每服一錢，以水一小盞，煎至五分，去滓。量兒大小以意加減，溫服。

《聖惠》又方

甘草（炙微赤，銼）川大黃（銼，微炒。各半兩）栝萸根（三分）

上件藥搗，粗羅為散。每服一錢，以水一小盞，煎至五分，去滓溫服。量兒大小以意加減。

《嬰孺》治小兒胃中熱，便利赤黃而難，或四、五日乃便利，此為胃中熱故也。

大黃（四兩）甘草（一兩，炙）栝萸（二兩）棗（二個）

上以酒、水各一升，煮一升。服一雞子許，日進三服。

錢乙論瀉黃散 又名瀉脾散

藿香葉(七錢) 山梔子仁(一兩) 石膏(半兩) 甘草(三兩) 防風(去蘆, 切, 焙, 四兩)

上銼, 同蜜酒微炒香, 為細末。每服一錢至二錢, 水一盞, 同煎至五分, 溫服清汁, 無時。南方多以寒水石為石膏, 以石膏為寒水石, 正與京師相反, 乃大誤也。蓋石膏潔白堅硬, 有牆壁; 而寒水石則軟爛, 以手可碎, 外微青黑, 中有細紋。方書中寒水石則火用之, 石膏則堅硬不可入火。如白虎湯用石膏, 則能解肌熱, 破痰, 治頭痛, 若用寒水石則誤矣。又有一等堅白全類石膏而方, 敲之亦皆成方者, 名方解石也, 代石膏用之。南人有不信此說者, 孝忠嘗相與同就京師大藥肆中, 買石膏、寒水石、方解石三種, 又同詣惠民和劑局, 及訪諸國醫詢証之, 皆合此說, 乃信服。孝忠頃編《保生信效方》已為辨論, 恐小兒尤不可誤, 故複見於此。

錢乙藿香散 治脾胃虛有熱, 面赤, 嘔噦涎嗽及轉過度者。

藿香(一分, 用葉) 半夏(曲炒) 甘草(炙) 麥門冬(去心, 焙乾秤) 石膏(各半兩)

上同為末。每服半錢至一錢, 水一中盞, 煎至七分, 食前溫服。

《活人書》甘露飲子 治胃中客熱, 口臭, 不思飲食, 或飢煩不欲食, 齒齦腫疼, 膿血, 舌口咽中有瘡, 赤眼, 目瞼重不欲開, 瘡疹已發未發並宜服。

熟乾地黃 生乾地黃 天門冬、麥門冬(各去心, 焙) 枇杷葉(去毛) 枳殼(麩炒, 去瓢) 黃芩 石斛(去苗) 山茵陳 甘草(炙。各等分)

上為細末。每服二錢, 水一盞, 煎至六分, 去滓溫服, 食後臨臥。

《聚寶方》四倍散 治小兒胃熱, 咽喉不利, 發歇如瘧、喘。

真珠(末, 四錢) 生犀(末, 二錢) 香附子(一錢) 龍腦(半錢)

上四味為細末。一服一字, 煎桃仁湯調下。乳母忌生冷。

《孔氏家傳》治小兒臟腑不調, 脾胃有熱。大便黃色。

燈心(一把) 扁竹(一錢) 槐花(一錢) 甘草(炙, 二錢)

上水三盞, 同煎至一盞, 去滓, 溫冷細服。

風熱第四

《素問》通評虛實論：帝曰：乳子而病熱，脈細小者何如？岐伯曰：手足溫則生，寒則死。乳子中風熱，喘鳴肩息者，脈何如？岐伯曰：喘鳴肩息者，脈實大也。緩則生，急則死。

《聖惠》論：夫小兒心肺壅滯，內有積熱。因母解脫，風邪傷於皮毛，入於臟腑，則令惡風壯熱。胸膈煩悶，目澀多渴，故曰風熱也。

漢東王先生《家寶》：小兒發熱，煩叫不時，面青，謂之風熱。

錢乙論急欲乳不能食云：猶客風熱傳於臍腹，流入心脾經，即舌濃唇燥，口不能吮乳，當涼心脾。

《顛凶經》治孩兒風熱。**側柏散方**

側柏 鬱金 天麻(酒浸一宿) 乾蠍 天南星 地黃(去土) 子芩 大黃(以上各半兩)
上為散。治風及驚，暖酒下，退熱，每夜熱水下半錢。

《元和紀用經》**蜀脂飲** 主小兒百病。服之消風涼肌，解熱止煩，不生瘡癩；除寒熱痰涎，赤目咽痛，血痢渴躁。長肌肉，利心肺，有補身體。有瘡膿潰亦腫，悉能療之。

蜀脂(灸黃也，一味末之。黃生隴西即陽者，火焦色黃白，甘美，生白水者冷補，性隴西省最好，皮赤色，專主消瘡磨腫。出原寧宜洲者亦佳，折之若綿不斷者為上等也) 甘草(四分之一)
上為末，方寸七，水一升，煎三分，減一分，三服。溫涼通性，大小以歲加減之。一方每服水五合，二說不同。今以藥末隨病、隨歲揆度而準之。《經》以四味飲、黑散丸、至聖散、五加皮治，不能行麝香丸。此蜀脂飲七方，謂之育嬰七寶，紫陽道士一方名保子七聖至寶方，專為一書者，此方是也。

《聖惠》治小兒風熱，心膈煩悶，身體壯熱，嗜睡多渴。**羚羊角散方**

羚羊角(屑) 麥門冬(去心) 甘草(炙微赤，銼。各三分) 白蘚皮 川升麻 茯神 人參(去蘆頭) 黃(銼。各半兩)
上件藥搗，篩為散。每服一錢，以水一小盞，煎至五分，去滓，入竹瀝半合，更煎一兩沸，分為二服。更量兒大小以意分減，溫服。

《聖惠》治小兒心肺風熱壅滯，胸膈不利。**白蘚皮散方**

白蘚皮 犀角(屑) 黃芩 知母 防風 沙參 人參(三味去蘆頭。以上各半兩) 甘草(一分，炙微赤，銼)
上件藥搗，篩為散。每服一錢，以水一小盞，煎至五分，去滓。量兒大小分減溫服。

《聖惠》治小兒肝肺風壅，致心膈不利，痰嗽。**大麻仁散方**

大麻仁 犀角(屑) 百合 杏仁(湯浸，去皮尖、雙仁，麩炒微黃。以上各半兩) 檳榔(一分) 牛黃 龍腦(各細研，一錢)
上件藥搗，細羅為散。煎生薑甘草湯調下半錢。量兒大小以意加減。

《聖惠》治小兒風熱，心神煩躁，少得睡。**牛黃丸方**

牛黃(一錢，細研) 朱砂(細研，水飛過) 犀角(屑) 川升麻(各半兩) 人參 防風(各去蘆頭) 麥門冬(去心，焙) 黃芩 赤茯苓 甘草(炙微赤，銼。各一分)
上件藥搗，羅為散，入研了藥，更研令勻，煉蜜和丸如綠豆大。每服煎竹葉湯研下五丸，日三、四服。量兒大小加減服之。

《聖惠》治小兒風熱，心神驚悸，臥不眠安。**真珠丸方**

真珠(末) 龍膽 防風(各去蘆頭) 羌活 鉤藤 川升麻 天竺黃 牛黃(二味細研。各一分) 茯神 人參(去蘆頭) 羚羊角(屑) 犀角(屑。各半兩) 鉛霜 腦、麝(並細研，一錢)

上件藥搗，羅為末，入研了藥，都研令勻，煉蜜和丸如綠豆大。每服以荊芥薄荷湯研下五丸，日三、四服。量兒大小加減。

《聖惠》治小兒心肺風熱。**龍膽丸方**

龍膽(三錢，去蘆頭) 牛黃(一錢，細研) 川大黃 胡黃連 犀角(屑。各二錢)

上件藥搗，羅為細末，入牛黃都研令勻，煉蜜和丸如綠豆大。每服以薄荷湯化破，服五丸。量兒大小以意加減。

《聖惠》治小兒風熱，心神驚悸。**犀角丸方**

犀角(屑) 天竺黃(研) 朱砂(研，水飛過) 鐵粉 人參 赤茯苓(各半兩) 牛黃 腦麝(各研，一錢) 鉛霜(研) 蚱蟬(銼，炒) 白附子(炮裂。各一分)

上件藥搗，羅為末，入研了藥，都研令勻。煉蜜和搗一、二百杵，丸如梧桐子大。每服以薄荷湯研下三丸。量兒大小以意加減。

《聖惠》治小兒風熱，鎮心安神化涎。**鉛霜丸方**

鉛霜 牛黃 天竺黃 麝香(各研) 天麻 甘草(炙。各一錢) 茯神 人參(各二錢) 龍腦(一分，研) 朱砂(半兩，細研，水飛過)

上件藥搗，羅為末，入研了藥，都研令勻。煉蜜和搗一、二百杵，丸如梧桐子大。不計時候，以薄荷湯研下一丸。量兒大小，以意加減。

《聖惠》治小兒風熱多驚。**朱砂丸方**

朱砂(細研，水飛過) 茯神 柴胡(去苗) 鐵粉(細研) 麥門冬(去心，焙。各半兩) 天竺黃(細研) 人參(去蘆頭) 黃耆(銼) 黃芩 甘草(炙微赤，銼。各一分) 牛黃 麝香(各細研，一錢)

上件藥搗，羅為末，入研了藥，更研令勻，煉蜜和丸如綠豆大。每服煎竹葉湯研下五丸。量兒大小以意加減。

《聖惠》治小兒心肺風熱，多驚鎮心。**鉛霜散方**

鉛霜 天竺黃(各細研一分) 柏子仁 白附子(炮裂) 牛黃 腦麝(各細研一錢) 朱砂(二錢，細研)

上件藥搗、細羅為散，入研了藥，都研令勻。每服以荊芥薄荷湯調下半錢，日三、四服。量兒大小以意加減。

《聖惠》治小兒風熱，心胸煩悶。**牛黃散方**

牛黃(一分，細研) 鬱金(末，半兩) 人參(末，一錢)

上件藥都研令勻。每服以荊芥湯調下半錢，日三、四服。量兒大小以意加減。

《聖惠》治小兒心臟風熱，昏憤躁悶，不能下食。**梨湯粥方**

梨(三枚，切) 粳米(一分)

上以水二升，煮梨取汁一盞，去渣投米煮粥食之。

《聖惠》治小兒心臟風熱，精神恍惚。**淡竹葉粥方**

淡竹葉(一握) 粳米(一合) 茵陳(半兩)

上以水二大盞，煎二味取汁一盞。去渣，投米作粥食之。

《聖惠》治小兒風熱嘔吐，頭痛驚啼。**葛根粥方**

葛根(一兩) 粳米(一合)

上以水二大盞，煎至一盞，去滓，下米作粥，入薑、蜜少許食之。

《靈苑》治小兒驚風內熱，渾身如火，心胸煩悶，不思飲食，吐逆不止及諸般風熱，大效。**三解散**

川大黃(微炒) 芍藥 甘草(炙) 乾蠍 白僵蠶 桔梗 人參 鬱金(各一分) 白附子 防風(各半兩) 黃芩(半兩)

上件藥一十一味並同搗，羅為細散。如渾身壯熱，吐瀉不止，用防風、麥芽煎湯調下一字，或半錢，或一錢。量兒大小加減服之。若只渾身熱、用甘草、柳枝煎湯下。如不退，用熟蜜、牛蒡子、薄荷湯調下。如吐瀉不止者，則用後方。

肉豆蔻(三個，用糊餅面裹，煨熟，候冷取出)

上為細末，卻取裹者面和杵，為丸如綠豆大。每服用飲湯吞下五丸至七丸，立止。

《靈苑》甘露丸解毒退風熱，治口舌乾燥，心煩身熱，夜臥驚悸，狂躁等候。(方見膈熱門，太醫局方同。)太醫局 **洗心散** 治風壅壯熱，頭目昏痛，肩背拘急，肢節煩疼，熱氣上沖，口苦唇焦，咽喉腫痛，痰涎壅滯，涕唾稠粘，心神煩躁，眼澀睛疼；及寒壅不調，鼻塞聲重，咽乾多渴，五心煩熱，小便赤澀，大便秘滯。

大黃(面裹煨，去面切，焙) 甘草() 當歸(去苗，洗) 麻黃(湯浴，不去節，焙乾，秤) 芍藥 荊芥穗(各六十兩) 白朮(一十五兩)

上為細末。每服二錢，水一盞，入生薑、薄荷各少許，同煎至七分，去滓溫服。如小兒麩豆瘡疹，欲發先狂語、多渴及驚風積熱，可服一錢，並臨臥服。如大人五臟壅實，欲要澹轉，加至四、五錢，乘熱服之。

太醫局 **牛黃生犀丸** 治風盛痰壅，頭痛目眩，咽膈煩悶，神思恍惚，心忪面赤，口乾多渴，睡臥不安，小便赤澀，大便多秘，小兒風熱痰壅。

牛黃(研) 生犀(鎊。各二兩半) 牙硝(研) 半夏(用白礬製) 天麻(去苗。各二十兩) 羚羊角(鎊) 膩粉 黃丹(各研) 雄黃(水飛。各五兩) 龍齒(水飛) 朱砂(飛研。各十兩) 龍腦(研，二兩半) 水銀(用鉛結砂子，秤十兩)

上為末，煉蜜為丸，每兩作二十丸。每服一丸，溫薄荷湯化下。中風涎潮，牙關緊急，昏迷不省，用膩粉一錢，藥三丸，生薑自然汁七點，薄荷水同化下。得吐或利，逐出痰涎即愈。小兒風熱痰壅，睡臥不安，上竄齒，每服半丸。加急驚風，涎潮搐搦，眼目戴上，牙關緊急，用膩粉半錢，生薑自然汁三、五點，薄荷水同化下一丸，更看歲數大小加減。

太醫局 **如聖湯** 治風熱毒瓦斯上攻，咽喉痛，喉痺腫塞妨悶，及肺壅咳嗽，咯唾膿血，胸滿振寒，咽乾不渴，時出濁沫，氣息腥臭，久久吐膿，狀如米粥。又治傷寒咽痛。

桔梗(一兩) 甘草(銼，炒，二兩)

上為粗末。每服二錢，水一盞，煎七分，去滓溫服。小兒時時呷服，食後臨臥。

太醫局 **龍腦飲子** 治大人、小兒蘊積邪熱，咽喉腫痛，赤眼口瘡，心煩鼻衄，咽乾多渴，睡臥不寧；及除痰熱咳嗽，中暑煩躁，一切風壅，並宜服之。

甘草(十斤，蜜) 藿香葉(一斤半) 石膏(四十兩，細研) 縮砂仁 栝蔞根(各三十兩) 大梔子(一百二十兩，去皮，微炒)

上為末。每服一錢至二錢，用新水入蜜調下。又治傷寒餘毒，潮熱虛汗，用藥二錢，水一盞，入竹葉五、六片，煎七分，溫，並食後服。

太醫局 **清涼飲子** 治小兒血脈壅實，腑臟生熱，頰赤多渴，五心煩躁，睡臥不寧，四肢驚掣，及因乳哺不時，寒溫失度，令兒血氣不理，腸胃不調。或溫壯連滯，欲成伏熱；或壯熱不歇，欲發驚癇。又治風熱結核，頭面瘡癩，目赤咽痛，瘡疹餘毒，一切壅滯，並宜服之。

大黃(米下蒸，切，焙) 赤芍藥 當歸(去蘆頭) 甘草(炙)

上等分，為粗末。每服一錢，水一中盞，煎至七分，去渣溫服。量兒大小、虛實加減，微瀉利為度。食後臨臥服。

太醫局 **消毒散** 治小兒瘡疹已出，未能勻透，及毒瓦斯壅遏，雖出不快，壯熱狂躁，咽膈壅塞，睡臥不安，大便秘澀。及治大人、小兒風熱，上膈壅熱，咽喉腫痛，胸膈不利方。

牛蒡子(，六兩) 甘草(炙，二兩) 荊芥穗(一兩)

上為粗末。每服一錢，用水一盞煎七分，去滓溫服，食後。小兒量力少少與之。如治瘡疹，若大便利者，不宜服之。

太醫局 **惺惺散** 治小兒風熱瘡疹，傷寒時氣，頭痛壯熱，目澀多睡，咳嗽喘粗，鼻塞流涕方。

桔梗 細辛(去葉) 人參(去蘆頭) 甘草(炙) 白茯苓(去皮) 栝蔞根 白朮(各一兩)

上七味同杵，羅為末。每服一錢，水一小盞，入薄荷三葉，同煎至四分，溫服。如要和氣，即入生薑煎服。不計時候。

太醫局 **鶴頂丹** 治大人、小兒風熱痰實，咽膈不利，口乾煩渴，睡臥不安，及中暑頭痛，躁渴不解方。

寒水石粉(一百一十兩) 麝香(研，二兩半) 甘草(銼，炒為末，三十五兩) 朱砂(飛研，一百兩) 牙硝(枯過，研，一百二十五兩)

上合研勻，煉蜜搜和，每一兩二錢作十丸。大人溫生薑水化下一丸。如治中暑，入生龍腦少許，同研細。新水化下。小兒一丸分四服，更量大小加減。又治小兒腑臟積熱，心神不寧，夜臥狂叫，口舌生瘡，用薄荷自然汁化下，並食後服。

《譚氏殊聖》治小兒風熱，狂語煩躁。**養心丹**

安息香(一兩半) 朱砂(飛過, 一兩) 真珠(末, 三分) 玳瑁(三錢, 水磨成粉) 牛黃 腦子(各一分)
上研令細, 以重湯酒煮, 安息香膏和勻, 丸如綠豆大。食後臨臥, 人參湯下三、五丸。

《嬰孺》**枳實丸** 治小兒瘙癢, 癢痛如疥, 搔之汁出, 身中 如麻豆, 年年喜發, 面目虛肥, 毛發細黃, 皮膚薄而光澤, 時生鼻氣。此是少時熱盛極, 體當風中, 風熱相搏所得也, 不治成大風疾方。

枳實(六分, 炒) 菊花 蛇床子 防風 白薇 蒺藜 浮萍草(各四分) 天雄(炮) 麻黃(去節) 漏蘆(各二分)

上為末, 蜜丸大豆許。五歲飲服十丸至二十丸, 至大者兒並大人可散服方寸匕, 酒服。量兒歲與之。

錢乙**抱龍丸** 治傷風溫疫, 身熱昏睡, 氣粗風熱, 痰實壅嗽; 治驚風潮搐及蠱毒中暑, 沐浴後並可服。壯實小兒宜時與服之。

天竺黃(一兩) 雄黃(水飛, 一分) 辰砂 麝香(各研半兩) 天南星(四兩, 臘月釀牛膽中, 陰乾百日, 如無, 只將生者去皮臍, 鏗, 炒乾用, 然不及。)

上為細末, 煮甘草水和丸皂子大, 溫水化下, 服之。百日小兒每丸分作三、四服, 五歲一、二丸, 大人三、五丸。亦治室女白帶, 伏暑, 用鹽少許, 嚼一、二丸, 新水送下。臘月中雪水煮甘草和藥尤佳。一法用漿水或新水浸天南星三日, 候透軟, 煮三、五沸, 取出乘軟切去皮, 只取白軟者薄切, 焙乾炒黃色, 取末八兩, 以甘草二兩半拍破, 用水二碗浸一宿, 慢火煮至半碗, 去滓; 旋酒入天南星末, 慢研之, 旋令甘草水盡, 入餘藥。《孔氏家傳》方同, 雲更加牛黃半分, 是孫兆方。

張渙治小兒風熱, **百合湯方**

百合 白朮(炮) 紫菀(洗, 焙乾) 人參(去蘆頭。各一兩) 白茯苓 青橘皮 麥門冬(去、心) 甘草(炙。各半兩)

上件搗, 羅為細末。每服一錢, 水八分一盞, 入竹葉三片、薄荷兩葉, 煎至五分, 去滓溫服。

《嬰童寶鑒》治小兒風熱, 體如湯火, 夜啼。**綠霞散方**

柏葉(二分) 天南星(炮) 僵蠶 蠅 鬱金(並末。各一分) 雄黃(末, 一錢)

上件都研勻, 每服薄荷蜜水下一字, 加至半錢。

《良方》治小兒風熱及傷寒時氣, 瘡疹發熱等。**桔梗散**

桔梗 細辛 人參 白朮 栝蔞根 甘草(炙) 白茯苓 芎

上等分為末。每服二錢, 水一盞, 薄荷二葉, 同煎七分。三歲以下兒作四、五服, 五歲以上分二服。予家常作此藥, 凡小兒發熱, 不問傷寒風熱, 先與此散服, 往往輒愈。兼服小黑膏尤善(方見傷寒門中。)此桔梗散與《活人書》方同, 名惺惺散。(《孔氏家傳》云: 惺惺散加鉤藤、蟬蛻與小兒吃, 甚妙, 理上壅風熱。)

《活人書》**連翹飲** 治小兒一切風熱方。

連翹 防風 甘草 山梔子

上件等分, 搗羅為散。每服二錢, 水一中盞, 煎七分。

《九 衛生》**黍粘子散** 療小兒傷寒，斑瘡、毒瓦斯，咽膈不利，聲不出、疼痛方。

牛蒡子(炒) 甜參 升麻 甘草(炙) 乾薄荷(等分)
上為粗末。每服一錢，水七分，煎至四分，去滓，不拘時候溫服。

《萬全方》治小兒風熱，心胸煩悶。**牛黃散**

牛黃(細研入) 馬牙硝(研。各一分) 鬱金(末，半兩) 人參(一錢，末)
上件都研令勻。每服半錢，以荊芥湯調下，日三、四。

《聚寶方》**牛黃丸** 治一切風熱，化涎止頭痛，解蠱毒。

黃牛膽(十二月收取汁，和天南星末入膽袋內，實填捏扁，掛透風處一百日) 水窟雄黃(每煎藥一兩用一分，水飛) 真麝香(研，炒，一錢)
上三味為末，糯米煮稀糊，丸皂子大。每服一丸。頭疼，金銀薄荷湯嚼下一丸；傷暑毒，生薑蜜水嚼下；纏喉風，生薑薄荷自然汁化下；小兒風熱，麥門冬熟水化下；解蠱，汗●洗湯化下五丸。余疾一丸或二丸。

如墜涎，生薑湯下；暴中風，豆淋酒下；沐浴傷風，溫酒嚼下。

《聚寶方》**惺惺散** 治小兒風熱溫壯，及外傷風冷。

桔梗 細辛(去葉) 甘草(炙) 人參 白茯苓(去皮) 栝蒌根 白朮(炮。各一兩)
上七味為細末，每服一大錢。水六分，薄荷少許，同煎至四分，溫服。如要和氣，即入生薑煎服。

《惠眼觀証》**牛黃丸** 下風熱，取涎泛。常不使 湯丸，只用此藥。

雄黃(一錢) 朱砂(二錢) 全蠍(七個) 輕粉(二匣)
上同研令勻，用飯飲丸如此○大。每服一歲以上十五丸，二、三歲以上二十五丸。其餘加減，大小服之。

《惠眼觀証》**烏犀膏**解風熱，開胸下膈。

乾地黃 元參(潤者) 牛蒡子(炒。各半兩) 甘草(炙，一分) 龍腦(少許，研)
上為末，煉蜜為膏。每服兩皂子大，蜂糖熟水下。

《張氏家傳》**天竺黃散子** 治小兒風熱驚風。

天竺黃 蟬殼 白僵蠶 山梔子 甘草(炙) 鬱金
上件等分，同杵，羅為末。每服一錢，熱水調下。三歲孩兒可半錢，牙兒只一字。

《張氏家傳》治一切風，鎮心化涎，療風壅痰實，頭痛目眩，怔忡惡心，神昏語澀，頸項拘急，手足麻痺。及治小兒風熱上盛，眠睡不寧，頰赤涎潮，欲變驚癇者，悉宜服之。應有風涎，食後最宜常服。**大牛黃丸方**

牛黃 生腦子(各秤半兩) 朱砂(研, 一兩半) 天南星(以漿水慢火煮一複時, 透心軟切, 焙, 或未軟, 更煮半日) 烏蛇(酒浸取肉) 白僵蠶(炒) 肥白天麻 人參(各一兩) 乾全蠍 白附子(各炒) 水磨雄黃(研) 生犀(鎊, 各三分) 麝香(一分)

上除研者藥外, 一處搗, 羅為細末。後入研者, 合和勻, 煉蜜為丸如雞頭大。每服一粒至二粒, 細嚼, 煎人參薄荷湯送下; 或化亦得。食後臨臥服。

《張氏家傳》: 小兒風熱, 肌瘦, 五心煩熱, 不長肌肉, 面黃痿瘦, 夜臥不安, 時發虛汗; 或臟腑泄瀉變痢, 難服涼藥, 可服**四順散方**

銀州柴胡(去蘆) 真地骨皮 白桔梗(各三錢) 甘草(炙, 錢半)

上件焙乾為末。每服一錢、半錢, 大小加減。水三分煎一分半, 溫溫服。

《莊氏家傳》**治風熱墜痰方**。

甘草(末, 二兩) 膩粉 青黛(各五錢) 麝(一錢)

上用白面五錢, 滴水丸如皂子大。每服一丸, 用倒流水化破。

《莊氏家傳》初春風熱擁毒, 利臟腑方。

黃芩 大黃 荊芥 甘草(炙, 各等分)

上為粗末, 每服一撮。水一盞, 煎五分, 量兒大小與服。

《莊氏家傳》治小兒風熱。**天竺黃散方**

天竺黃 人參 甘草(微炙, 各一兩) 鬱金(二兩, 濕紙裹煨) 白藥子(二兩, 大皂角三捶捶碎, 浸三宿, 焙乾)

上件一處搗, 羅為末。每服一錢或半錢, 用溫蜜水調下, 常服甚妙。此藥是知廣州南海縣殿中丞張士明傳。

《趙氏家傳》**青芝散** 解風化熱, 涼利咽喉, 清心肺經。春初冬末最可常服方。

鼠粘子(微炒出汗) 甘草 元參(各二兩) 荊芥穗(一兩)

上為末, 每服一錢。水一小盞, 煎至七分, 溫服。小兒傷風, 風熱瘡疹尤宜服之。大人每服三錢。

《吉氏家傳》治心臟風熱。**地黃膏方**

馬牙硝 鬱金 豆粉 甘草(炙, 各等分) 腦麝(各少許)

上為末, 用生地黃汁煉蜜為膏。用薄荷湯化下。

《吉氏家傳》治風熱, 調脾胃。**人參飲子方**

人參 茯苓(煮) 甘草(炮) 紫河車 藿香(各等分。續入白附子、白朮尤佳)

上細銼。每服一錢, 以水煎作飲子服。大退小兒風熱。

《吉氏家傳》治風熱面赤, 渾身壯熱如火。**蟬蛻散方**

蟬蛻(三個,炒) 漏蘆 羌活 天麻 防風 當歸 升麻 川白芷 射乾 苦桔梗 甘草(炙) 川芎 地骨皮
上等分為末。每服一錢,水一盞,煎四分,溫服。

《吉氏家傳》治驚風熱。散方

蟬蛻 升麻 朱砂 腦子 甘草(炙) 沒藥 白附子(各一分)
上為細末。每服一錢,麥門冬熟水調下。

《吉氏家傳》退驚熱,風熱。天竺黃散方

天竺黃 蟬蛻(洗) 甘草(炙) 山梔子仁 鬱金(煎五次) 僵蠶(炮)
上等分,細末。每服一錢,香熟水調下。薄荷湯亦可。

《吉氏家傳》治一切風熱。龍腦散方

龍腦 薄荷 僵蠶 川芎 防風 甘草(炙。各半兩) 細辛(半錢)
上件末,米飲下半錢,臨時看病別使湯使。

《吉氏家傳》甘露散 治小兒風熱痰多,頭皮,多啼煩躁方。

寒水石 石膏(各 紅為度) 甘草(炮。各等分)
上為細末。每服半錢或一字,薄荷湯下。

長沙醫者丁時發傳鎮心丸 治小兒心臟風熱,咽喉乾,痰實,睡臥多驚,頰赤方。

朱砂(研,水飛) 人參 茯苓 乾山藥(各一兩) 馬牙硝(半兩) 腦麝(各少許)
上為末,蜜丸雞頭子大。薄荷湯下,大小加減。

長沙醫者丁時發傳勝金丸 解小兒一切風熱,諸般熱症等。驚風涎盛,搐搦不定,如服此藥,必吐涎
或瀉出涎,藥之功也。

鬱金(皂角煮,焙) 雄黃 白礬 朴硝(各一錢) 巴豆(七粒,出油) 輕粉 大黃(各半錢)
上為末,麵糊為丸粟米大。每服五、七粒,金銀薄荷湯下。

煩熱第五

(腳手心熱並五心熱附)

《巢氏病源》煩熱候：小兒臟腑實,血氣盛者,表裡俱熱,則苦煩躁不安,皮膚壯熱也。

《小兒形証論》四十八候肺臟伏熱歌：

肺家伏熱病難測,夜臥心煩大便結。勸君微取三兩行,次進溫平藥教吃。如加口臭鼻清涎,更問根源
須保惜。若還壯熱怕難醫,妙劑休來謾相逼。此病大小腸風,結澀不通,當進寬大腸檳榔散(方見本
門。)潮熱口臭,鼻有清涕,恐難治,為脾肺損也。

《本草》去小兒煩熱，止渴方。

方諸水上向月取之，得三、二合水飲之。

陶隱居去小兒煩熱驚氣方

上用景天葉，不以多少，煎湯洗浴，妙。

孟詵治小兒熱驚癇，頭生瘡腫，卒煩熱方。

上用白鴨肉和蔥豉作汁飲之。

《千金》竹葉湯 主五心熱，手足煩疼，口乾唇燥，胸中熱方。

竹葉 小麥(各一升) 知母 石膏(各三兩) 黃芩 麥門冬 茯苓(各二兩) 人參(一兩半) 生薑(五兩)
甘草(炙) 栝蒌根 半夏(各一兩)

上十二味 咀，以水一斗二升，煮竹葉小麥取八升，去滓；內藥煮取三升，分三服，老小五服。

《聖惠》治小兒臟腑壅實，心神煩熱，睡臥不安。黃芩散方

黃芩 川大黃(銼碎，炒) 甘草(炙) 川芒硝 麥門冬(去心) 石膏(各半兩)

上件藥搗，粗羅為散。每服一錢，以水一小盞，煎至五分，去滓。量兒大小以意分減，不計時候，溫服。

《聖惠》治小兒氣壅煩熱，心躁目赤。大青散方

大青 川大黃(銼，炒。各半兩) 牛黃(半分，細研) 朱砂 甘草(炙赤，銼) 犀角(屑) 元參 川升麻 梔子仁(各一分)

上件藥搗，細羅為散，入研了藥，都研令勻。不計時候，以沙糖水調半錢服。量兒大小以意加減。

《聖惠》治小兒煩熱多驚。人參散方

人參(去蘆頭) 天竺黃(細研) 鉤藤(各一分) 甘草(半兩，炙赤，銼) 牛黃(半分，細研)

上件藥搗，細羅為散。不計時候，煎竹葉湯調下半錢。量兒大小以意加減。

《聖惠》治小兒煩熱，昏悶多睡。犀角散方

犀角(末，半兩) 青黛 代赭 朱砂(各一分) 蛇蛻皮(灰，一錢)

上件藥都研為散。每服以溫水調下半錢。量兒大小加減服之。

《聖惠》又方

青黛(三分) 麝香(半分) 朱砂(一分) 乾地龍(七條，炒，為末)

上件藥都細研為散。每服以粥飲調下半錢。量兒大小加減服之。

《聖惠》治小兒心臟氣壅，煩熱悶亂。龍膽丸方

龍膽(去蘆頭) 黃連(去鬚。各一兩) 鉛霜(半兩) 牛黃(一錢) 鐵粉(一分。各細研)
上件藥搗，羅為末，都研令勻，以粟米飯和丸如綠豆大。不計時候，以薄荷蜜水下五丸。量兒大小以意加減。

《聖惠》治小兒心臟積熱，煩躁恍惚。**牛蒡粥方**

牛蒡根汁(一合) 粳米(一合)
上以水一大盞煮粥，臨熟投牛蒡汁攪勻，空腹溫溫食之。

《靈苑》**小金箔丸** 解大人、小兒心臟壅毒，咽喉不利，上壅口瘡，夜臥不穩，心膈煩躁。化痰毒風涎，安魂定魄。治驚邪，鎮心神；解室女骨蒸熱勞方。

金箔(五片) 朱砂 琥珀 雄黃 礞砂 鉛白霜(各二錢) 白龍腦 生犀(末) 天竺黃 寒水石(過。各三錢)
牛黃(少許研)
上十一味同入乳鉢內，細研如粉，用粟米飲為丸如小豆大。每服五丸，用竹葉熟蜜水下。舊方云：大金箔丸治大人疾，小金箔丸治小兒疾，今亦互服。但小金箔丸正涼，大金箔丸小溫而治風。

《嬰孺》治小兒煩熱。**雷丸浴湯方**

雷丸(二十個) 大黃(四兩) 黃芩(一兩) 丹參(二兩) 苦參 石膏(研。各三兩)
上以水二升，煮一升半。浴兒訖，粉粉之，勿濃衣，一宿複浴，避陰及目。一方只用石膏末半升，雷丸五兩，以雪水六升煮二升，用帛染拭頭體。

《萬全方》治小兒煩熱多驚。**茯神散**

茯神 人參 天竺黃(研) 鉤藤(各一分) 牛黃(半分，研入) 鬱金 甘草(炙。各半兩)
上搗羅為末。每服半錢，煎竹葉湯調下。

《萬全方》治小兒煩熱驚悸。**竹瀝犀角飲子**

竹瀝(二合) 犀角(不計多少)
上件藥將犀角於竹瀝內磨，令濃。量兒大小分減服。

《四十八候》治伏熱心煩，疏風順氣。**檳榔散方**

檳榔(生) 大黃(蒸) 青皮(各一分) 黑牽牛(一錢，微炒) 木香(少許，炮)
上為末。每服一錢，薄荷蜜水調下。

《莊氏家傳》：初冬陽盛熱壅，臥不穩，手腳心煩熱。

川大黃 川升麻 白芍藥(等分)
上為粗末。每服二錢，用竹茹水七分，同煎四分，去滓溫服。三、兩夜一服，冬至後一夜一服。

漢東王先生《家寶》：小兒發熱，早晚兩度者，謂之驚熱，世呼為潮熱。

漢東王先生《家寶》潮熱病証：小兒潮熱，蓋因血氣壅盛，五臟生熱熏發於外，故令發熱。大體與溫壯相類，或夾伏熱，或帶宿寒。夾伏熱者，大便黃而臭；帶宿寒者，大便白而有酸氣。皆緣臟腑不調，冷熱之氣俱盛，腸胃蘊積，是為溫壯候也。其不至熱盛者，宜進麥湯散三、二服解之（方見傷寒發斑門中，）次下金蓮散三、二服退熱（方見夾驚傷寒門中，）更須進七寶輕青丹三、二服（方見單傷寒門中。）如依次用藥不退，其熱轉盛，睡裡多驚，宜進鐵涎膏三、二服（此見本門。）如用此藥不退，是有驚積、食積，須當下之。依前法用水精丹一服利之（方見夾食傷寒門中，）至天明，有五色積毒，狀如魚涎粘滑之物下，即其驗也。宜用人參散（方見夾食傷寒門中，）觀音散調理（方見胃氣不和門中。）如有餘熱未退，用輕青丹退之。

錢乙有潮熱問難云：皇都徐氏子三歲，病潮熱。每日西則發搐，身微熱，而目微斜及露睛，四肢冷而喘，大便微黃。錢與李醫同治。錢問李曰：病何搐也？李曰：有風。何身熱微溫？曰：四肢所作。何目斜睛露？曰：搐則目斜。何肢冷？曰：冷厥必內熱。曰：何喘？曰：搐之甚也？曰：何以治之？曰：嚏驚丸鼻中灌之，必搐止。錢又問曰：既謂風病溫壯，搐引目斜露睛，內熱肢冷及搐甚而喘，並以何藥治之？李曰：皆此藥也。錢曰：不然。搐者肝實也，故令搐。日西身微熱者，肺潮熱用事，肺主身溫，且熱者為肺虛。所以目微斜露睛者，肝肺相勝也。肢冷者，脾虛也。肺若虛甚，母脾亦弱，木氣乘脾，四肢即冷。治之當先用益黃散（方見胃氣不和門中）、阿膠散（方見喘咳上氣門中），得脾虛証退後，以瀉青丸（方見驚熱門中）、導赤散（方見實熱門中）、涼驚丸治之（方見一切驚門中）。後九日平愈。

《千金》治小兒潮熱。蜀漆湯方

蜀漆 甘草(炙) 知母 龍骨 牡蠣(各二兩)

上五味 咀，以水四升，煮取一升，去滓。一歲兒少少溫服半合，日再。

《食療》治大人及小兒潮熱方。

雞卵(三個) 白蜜(一合)

上相和服之，立瘥。

《嬰孺》治小兒驚啼發，積熱潮作，惕惕為病，大便青黃赤白方。

牛黃(八銖) 牡蠣(炒赤) 雄黃(各十銖) 朱砂(末，五銖) 巴豆(二個，去皮，炒)

上為末，煉蜜丸，杵千下。一月、五十日兒黍米大，先發時飲下三丸，日進二服。百日兒服胡豆大二丸，一二歲服麻子大二丸。服了令乳母抱臥炊斗米久，兒常睡，身輕汗出解，一服不解，再服之。若只傷乳不安，腸中有痰，乳澹微下如斷雞子、鳥屎、鼻涕，勿訝，便勿服藥。

漢東王先生治嬰孩小兒諸驚、夜啼、手足微動及潮熱盛者。鐵涎膏方

鐵焰粉 白附子 辰砂(各一錢) 丁頭大赭(半兩，生) 腦麝(各一字)

上除腦、麝別研，余為細末，蒸棗子去核，爛為膏。每服嬰孩半皂子大，三、二歲一皂子大，金銀薄荷湯化下。

《嬰童寶鑒》治小兒驚熱潮熱。**牛黃散方**

牛黃(一字) 甘草(炙, 一錢) 馬於硝(研) 天竺黃(研, 各一分) 麝香(半字) 朱砂(二錢) 鬱金(半兩, 漿水浸令透, 焙乾)
上件為散。每服一字半錢, 薄荷湯下。

《嬰童寶鑒》: 小兒潮熱。**鉤藤飲子方**

鉤藤 大黃(煨) 甘草(炙) 芍藥 乾地黃(各一兩)
上件粗篩為散。每服一大錢, 水一小盞, 煎至半盞, 服之。

《聚寶方》**鉤藤散** 治小兒風熱、驚熱、疳熱、潮熱。

鉤藤(一兩) 使君子 乾蠍 白僵蠶(直者, 各七個) 人參 白茯苓 甘草(炙) 紅芍藥 當歸 天麻 川大黃(各三分)
上十一味為末。每服一大錢, 竹葉少許, 大豆二十一粒, 同煎至七分, 去滓溫服, 不計時候。

《張氏家傳》退小兒潮熱。

當歸 芍藥(赤者) 柴胡(去蘆) 茯苓
上件等分為末。每服一錢, 水半盞煎二分, 通口服。

《莊氏家傳》小兒潮熱, 四順飲子入地骨皮煎。

《莊氏家傳》鎮心壓驚, 退潮熱, 治盜汗, 殺疳蛔, 療腹大, 醫瀉痢, 安和五臟, 益顏色, 治瘡疥, 長肌膚。宜服**龍麝青金丸方**

腦麝(一字) 青黛 雄黃 朱砂 胡黃連 蘆薈 膩粉(各一分)
上八味杵, 研為末, 豬膽蒸餅, 為丸如綠豆大。晒乾入瓷器內收之。凡用每服二丸至三丸。一切驚悸, 體熱, 瘡疥, 薄荷湯下。一切疳氣, 瀉痢蛔蟲, 米飲下。常服百病不生。

《孔氏家傳》**金箔麝香丸** 退小兒潮熱方。

鬱金(一兩) 皂角(三枚) 巴豆(四十個)
上件都拍破, 用水三碗, 同煎至水盡, 只揀鬱金切作片子, 焙乾為末, 以麵糊為丸如粟米大, 以麝常熏之。每服五、七丸, 米飲下。效。

《孔氏家傳》治小兒寒邪時氣、瘡疹、變蒸、潮熱、涎漱、頭痛。**羌活散方**

川羌活 白獨活 柴胡 芎 人參 枳實(去瓢, 麩炒) 白茯苓 甘草(炙, 各一兩) 前胡 桔梗 地骨皮 天麻(酒浸, 炙, 各半兩)
上為末。每服一錢, 水七分盞, 入薄荷少許, 同煎五分, 去滓溫服, 不拘時候。

《趙氏家傳》**朱砂膏** 治小兒驚風潮熱，神志不寧，驚惕忪悸，夜臥不安，狂語驚啼。久服涼藥過多，脾胃虛寒，陰極似陽，頰赤神昏，引飲煩躁，不進乳食。此藥性溫不冷，非與腦、麝寒藥之比，常服大有所益，肥健孩兒。

朱砂 人參(各二錢) 蠍梢(二十一箇) 白僵蠶(酒浸，焙乾) 天仙子(好酒少許炒熟。各一分) 大天南星(一個，先用酸齏汁洗去滑，火炮裂，先為細末，生薑汁和作餅子，火炙令黃色，凡如此三次) 上為末，煉蜜為膏。每服皂兒大，薄荷湯下。

長沙醫者丁時發傳治小兒潮熱。**朱砂膏**

朱砂 人參 茯苓 甘草(炙。各一錢) 蠍 輕粉(各一分) 大黃 天南星(去皮，炮。各半錢) 馬牙硝(一錢半) 腦麝(各少許) 雄黃 鬱金(皂角半條揉，水煮乾為度。各半兩) 上件為末，蜜為膏，皂子大。每服一粒，用荊芥煎湯化下。

長沙醫者鄭愈傳秦芩散 治小兒潮熱方。

秦芩 柴胡 大黃(各一分) 上件為末。每服半錢，水五分，入韭白三寸，同煎至三分，去滓溫服，不計時候。

長沙醫者鄭愈傳小兒潮熱方。

知母 貝母(各一分半) 牙硝 寒水石(各一分) 荷葉(一兩，水煮五、七沸，焙乾) 上為末。每服半錢，蜜水調下。

長沙醫者鄭愈傳治驚風潮熱，身體溫壯等，兼治夜啼。**天竺黃散方**

天竺黃 鬱金(各二錢) 甘草(炙，三錢) 朱砂 麝香(各少許，別研) 山梔子仁(十個) 乾葛 全蠍(炙) 馬牙硝(各一分) 僵蠶(七個炒) 蟬蛻(三、七個，洗，去尾、頭、足) 上件為末，入朱砂、麝香和勻、再勻。每服一字，薄荷蜜水調下。夜啼不止，燈心湯下。

積熱第七

《玉訣》論積熱者，因口不慎味，常餐粘食、腥膻、肥膩、冷滑、瓜果之物，已傷脾胃病也。胃腑虛微，結實難化，生瘡癥積，或胸脅之間，攻沖榮衛，嘔逆氣粗，眼澀，加渴，泄瀉，兩脅脹滿。以湯散續，便宜疏宣，服千金丸(方見本門。)

《形証論》四十八候心臟積熱歌：

孩兒有積饒多渴，乳食都忘困難撥。壯熱瀉食食不消，四肢逆冷吐時厥。須知心臟積居中，取積於中方退熱。熱退調和即有功，莫使結毒恐驚掣。此病先取積，後調氣。此小餘熱不妨。取虛中積，皂角膏。(方見本門。)

《靈苑》治小兒諸驚、積熱，解痰毒。**金砂丹方**

光明砂 麒麟竭 沒藥 甘草(炙。各一分) 生白面 麝香(各二錢)

上件六味各研，杵為末，同合和勻，以軟飯為丸如小豆大。每服臨臥時用薄荷水化下一丸。如解食毒，用好茶下三丸，更用四。量小兒年數大小，臨時加減。

太醫局 妙香丸 取小兒積熱方。

辰砂(飛研，九兩) 牛黃 膩粉 腦麝(四味並研。各三分) 金箔(九十箔，研) 巴豆(三百一十五粒，去皮心膜，炒熟，研如面油)

上合研勻，煉黃蠟六兩，入白沙蜜三分，同煉令勻為丸，每兩作三十丸。解五毒，治潮熱、積熱等疾。如治潮熱積熱、傷寒結胸、發黃狂走，躁熱口乾面赤，大小便不通，煎大黃炙甘草湯下一丸。毒利下血，煎黃連調膩粉少許下。如患酒毒、食毒、茶毒，氣痰伏痞吐逆等，並用膩粉龍腦米飲下。中毒吐血，悶亂煩躁欲死者，用生人血下，立愈。小兒百病驚癇，急慢驚，風涎搐搦，龍腦膩粉蜜湯下綠豆大二丸。諸積食積熱，頰赤煩躁，睡臥不寧，驚哭瀉痢，並用金銀薄荷湯下。更量歲數加減。如大人及婦人，因病傷寒時疾，陰陽氣交結，伏毒瓦斯胃中，喘躁、眼赤，胡發不定，再經日數七八日以上，至半月日未安，醫所不明証候，脈息交亂者，可服一丸，或分作三丸亦得。並用龍腦膩粉米飲調半盞以來下此藥，一服取轉，下一切惡毒涎並藥丸。瀉下如要卻收，水洗淨，以油單子裹埋入地中，五日取出，可再與大人、小兒依法服一丸，救三人即不堪使。如要藥速行，即用針札一眼子，冷水浸少時服之，即效更速。

太醫局 天竺飲子 治大人、小兒臟腑積熱，煩躁多渴，舌頰生瘡，咽喉腫痛，面熱口乾，目赤鼻衄，丹瘤結核，癰瘡腫痛。又治伏暑躁熱，瘡疹餘毒及大便下血，小便赤澀方。

甘草(銼，煨，二十斤) 大梔子(去皮，炒) 連翹(各四十兩) 栝蔞根(十斤) 雄黃(飛，研，五兩) 鬱金(用皂角水煮，切作片子，焙乾，秤二十兩)

上為細末。每服一大錢，食後臨臥，用新水調服。小兒半錢，臨時更量兒大小，以意加減服。

錢乙桃枝丸 疏取積熱及結胸，又名桃符丸方。

巴豆霜 川大黃(末) 黃柏(末。各一錢一字) 輕粉 砂(各半錢)

上為細末，麵糊丸粟米大。煎桃枝湯下，一 五、七丸，五、七歲二、三十丸，桃符湯下亦得；未 三、二丸，臨臥。

《玉訣》千金丸 取積熱方。

生大黃 滑石(研) 皂角(炙) 巴豆(去殼，出油盡)

上等分為末，麵糊丸如粟米大。每服五丸十丸，茶湯下。

《玉訣》治小兒驚風積熱。鎮心定魄，安魂去風方。

牛黃 腦子 鉛白霜(各三錢) 朱砂 川甜硝(各一錢)

上件藥一處研如膏。薄荷溫水下一字，二歲以下半字。風搐搦，研犀角溫水下。

《四十八候》治小兒心臟積熱。皂角膏方

砂(飛過) 粉霜(各一錢) 輕粉 白丁香(各半錢) 乳香(二錢) 巴豆(十五粒, 去油)
上用棗肉丸如梧桐子大。量兒大小加減, 臨臥皂角煎湯下。

《四十八候》皂角膏取積熱後, 服調胃散方

人參(三錢) 白朮(二錢半) 甘草(炙) 白茯苓 罌粟子(各一錢) 白附子(半分) 藿香 丁香(各半錢)
上末, 紫蘇湯下半錢、一錢。

《劉氏家傳》**李琬防風散** 治小兒五臟積熱, 驚風, 頭面赤熱, 口舌生瘡, 好飲冷, 宜服之。

防風(去蘆頭) 甘草(炙黃) 柴胡(去苗) 連翹 山梔子

上件等分, 杵為粗末。每服一錢, 水五分, 煎三分, 去滓溫服。一歲兒一服, 可分四次; 三歲兒可作兩服飲之。大小量力加減。

《張氏家傳》**威靈仙丸** 治小兒積熱方。

威靈仙 大黃 當歸 甘草(炙) 芍藥

上為細末, 煉蜜丸如彈子大。每服一粒, 食後與服。

《莊氏家傳》治小兒積熱。**五金丸**(一名五毒丸方。)

雄黃(一分) 鬱金(一錢) 巴豆(和殼秤一錢, 去殼並心膜, 十重紙壓去油, 用霜)

上為末, 醋糊為丸如綠豆大。每服一丸, 柏枝湯下, 午中、一更各一服。治小兒積熱, 毒生丹瘡, 並吐血下血等熱毒之疾。治藥毒、氣毒、陽毒、陰毒、食毒, 薄荷酒或薑蜜湯下。如中藥毒, 以伏龍肝為末, 水調下。治腹脹氣急, 大小便不通, 痰喘咽疼, 腮腫腮高, 卒中不語, 大消痰毒。

《莊氏家傳》治小兒積熱諸疾, 初冬孩子壅熱涎嗽, 宜服此藥。名為蟬殼丸

蟬殼 麝香 天南星(各半分) 朱砂(二分) 蠍(一個, 首足全)

上件為末, 爛飯和丸粟米大。一服五、七丸, 熟水吞下。

《莊氏家傳》退小兒積熱。**越桃飲子方**

山梔子 甘草(炙) 大黃 紅芍藥(各一分) 連翹 黃芩(各半分)

上件六味一處為末。每服半錢至一錢, 用蜜湯調下, 大退積熱。

《莊氏家傳》**涎壽膏** 療小兒心臟積熱, 大人、小兒口瘡方。

白羯 羊膽(一只, 臘日者, 或臘月者皆可) 馬牙硝(半兩) 朱砂(一分)

上細研, 盛於膽內, 當風懸之, 候過清明可開。再研極細, 入腦、麝少許, 生蜜和為膏子, 以瓷器中盛。量兒大小加減。乾服如紫雪法。

《莊氏家傳》治小兒上膈積熱。化涎、利胸膈, 治咽喉方。

硼砂 鉛霜 牙硝 甘草(以豬膽四個，去火二醮汁炙盡為度。各一兩) 龍腦(少許)
上先將四味研細，後將甘草別搗為末，拌勻。每服一字，以新水調下。

《趙氏家傳》春疏下積熱，切忌用元子藥，徒損胃氣，積熱不行方。

錦紋大黃(生，切碎，煨，一分) 甘草(一寸許，炙，切碎) 不蛀肥皂角(一寸許，不用切)
上件三味用水一平碗，同煎至半碗以下，去滓。臨臥帶熱服，次日取下熱氣。更看大便，黑色即一年無病，如不動，即別作一料，加生薑、製濃朴二錢，切碎同煎，須天氣晴明服。十五歲以上可作一服，小兒量度與之。

《吉氏家傳》治積熱。金露散方

鬱金(一個，水煮五次，焙) 天竺黃 大黃(蒸三次，切) 乾地黃 牙硝(各一分) 甘草(半兩，炙)
上件細末，每服半錢，漿水調下。

實熱第八

錢乙附方：凡小兒實熱，疏轉後如無虛証，不可妄溫補，熱必隨生。

姚和眾治小兒腦熱，常閉目方。

上用大黃一分，粗銼，以水三合浸一宿，一歲兒每日與半合服，余者塗頂。

日華子治小兒熱發。

上煎郁李仁，作湯浴之。

《聖惠》碧雪煎 治心神煩熱，時行溫病。生癲癩，療熱毒風，壓丹石，解百毒，去頭疼、赤眼、口瘡、酒黃。

大人小兒一切熱病，悉能治之方。

大青 竹茹 子芩 甘草(生用) 枳殼(去瓢) 地骨皮 龍膽(去蘆頭) 元參(各二兩) 吳藍葉 麥門冬(去心) 犀角(屑) 赤茯苓 川升麻 羚羊角(屑。各二兩)

以上並細銼，以水二斗，煮至一斗，去滓澄清。

龍齒 牛黃(各細研，二兩) 麝香(一兩，細研) 青黛(五兩，細研) 川朴硝(七斤，煉好者)

上件煎了藥汁入於鍋內，下朴硝以慢火煎，不住手攪，稀稠得所，入研了龍齒、牛黃、麝香、青黛等，攪令勻，入瓷器中收。每有患者，以冷水調下半匙，量大小加減服之。

太醫局 八正散 治大人、小兒心經邪熱，一切蘊毒，咽乾口燥，大渴引飲，心忪面熱，煩躁不寧，目赤睛疼，唇焦鼻衄，口舌生瘡，咽喉腫痛。又治小便赤澀，或癃閉不通及熱淋、血淋，並宜服之。

瞿麥 木通(各銼) 滑石 蓄 車前子 山梔子仁 甘草(炙) 大黃(銼，面裹煨，去面切，焙。各一斤)
上為散。每服二錢，水一盞，入燈心煎至七分，去滓溫服，食後臨臥。小兒量力少少與之。

太醫局 **金屑辰砂膏** 治小兒心經邪熱，頰赤多渴，睡臥不寧，譫語狂妄，痰涎不利，精神恍惚；及大人痰熱蘊積，心膈煩躁，咽喉腫痛，口舌生瘡方。

辰砂(研，水飛，三兩) 人參(去蘆頭，一兩) 甘草(炙，銼，二兩) 蛤粉(水飛，八兩) 生龍腦(二錢，研) 金箔(三十片，為衣) 鐵粉(研) 馬牙硝(枯，研。各半兩)

上為細末，煉蜜搜和。每一兩半作二十丸，捏扁，用金箔為衣。每服半皂子大，大人一丸分作兩服，並用薄荷湯化下，食後臨臥服。

《養生必用》**知母柴胡湯** 治大人、小兒實熱，赤眼口瘡，傷寒後煩渴手足熱方。

知母 柴胡(去苗) 茯苓 茯神 甘草(炙) 人參(等分)

上為末。每服二錢，水一盞，煎至七分，去滓。食後溫服，日二、三。

茅先生治小兒實熱。**牛黃丸方**

雄黃(四錢，別研) 輕粉(二錢) 朱砂(一錢，別研) 全蠍(二十八個，去尾丁) 腦麝(隨意入用) 川巴豆(二十個，去皮心膜，並華水浸一宿，爛研，不去油)

上件一處為末，用軟飯為丸。此大。每服七丸、十四丸，量兒大小，五更初用薄荷薑棗煎湯下。天明即通三、五行，用勻氣散補(方見胃氣不和門。)此藥常服三、二丸，大假退熱。

茅先生治小兒諸熱。**天竺黃散方**

天竺黃 川鬱金(用皂角水煮乾) 茯苓(去皮) 麥門冬子(各半兩) 蟬蛻(去足) 蠍(去土) 白僵蠶(各十四個)

甘草(一兩，炙) 朱砂(一分) 腦麝(隨意所入)

上件各淨洗，研、羅為末。每服半錢、一錢，用蜜熟水調下。

茅先生治小兒潮熱、實熱。**三解牛黃散方**

白僵蠶 全蠍(去土，炙) 防風 白附子 川黃芩 桔梗 川大黃 甘草(炙) 白茯苓 人參 川郁金(用皂角水煮乾)

上前件各等分為末，各淨洗，研為末。每服半錢、一錢，用薄荷蜜熟水調下。

《嬰孺》治小兒體有熱，熱實黃瘦，大便澀，食進少，兼驚。不可常服，宜消熱。**大黃丸方**

大黃(十分) 柴胡 升麻 杏仁 芍藥(各四分) 枳實(三分，炙) 黃芩 知母 梔子仁(各五分) 鉤藤皮(二分，炙) 寒水石 細辛(一分)

上為末，蜜丸大豆大。白飲下，三歲十五丸，常取通為度。

《嬰孺》治少小服湯丸，得大吐利後，身壯熱，精彩慢或微汗出，內有結熱。**大青湯方**

大青(三分) 大黃 甘草 麻黃(去節。各二分)

上切，以水二升煮麻黃，去沫，下藥煮一升，為四服。日進三服，夜一服。

《嬰孺》治小兒生四十日，服藥下後，身壯熱如火，狀如傷寒，頭面丹腫，腹滿，此內有伏熱。**龍膽湯方**

龍膽 葵子 葳蕤 大青 柴胡(各一分) 茯苓 甘草(各二分)

上以水二升，煮八合，為五服。日進三服，夜一服。

錢乙治小兒心氣實，則氣上下行澀，合臥則氣不得通，故喜仰臥，則氣上下通直。**瀉心湯方**

上用黃連一兩去鬚，為細末。每服一字至半錢，臨臥溫水調下。

錢乙治小兒心熱，視其睡，口中氣溫，或合面睡，反上竄切牙，皆心熱也。心氣熱則心胸亦熱，欲言不能而有就冷之意，故合面臥。宜導赤散方

生乾地黃(焙，秤) 木通 甘草(炙。各等分)

上同為末。每服三錢，水一盞，入竹葉同煎至五分，食後溫服。一本不用甘草，用黃芩。

錢乙治小兒肺熱，手招眉目鼻面。**甘桔湯方**

甘草(炒，二兩) 桔梗(米泔水浸一宿，焙熱，用一兩)

上為細末。每服二大錢，水一盞，入阿膠半片炮過，煎至五分，食後溫服。

錢乙三黃丸 治諸熱方。

黃芩(半兩，去心) 大黃(去支，濕紙裏煨) 黃連(去鬚。各一分)

上同為細末，麵糊丸綠豆大，或麻子大。每服五、六丸至十五丸、二十丸，食後米飲送下。《聖惠》上同，每服只五丸。

錢乙附方 治小兒蓄熱在中，身熱狂躁，昏迷不食。

大梔子仁(七個，捶研) 豆豉(半兩)

上共用水三盞，煎至二盞，看多少服之，無時。或吐或不吐，立效。

錢乙附方白虎湯 解暑毒，煩躁、身熱、痰盛、頭痛、口燥大渴。

知母(焙乾，秤一兩半) 甘草(半兩，銼碎) 石膏(四兩) 白粳米(八錢)

上同為粗末。每服三錢，水一盞，煎至八分，食後溫冷隨意服。氣虛人加人參少許同煎。

張渙 **清肌散** 治小兒初春不問有病無病，但宜服疏解積熱方。

當歸 川大黃(微炮，銼) 人參(去蘆頭。各一兩) 芍藥 甘草(炙) 犀角(各半兩末)

上件搗，羅為細末。每服一錢，水一盞，入生薑三片，竹葉二片，同煎至五分，去滓，放溫乳食後服。量兒大小加減。

《劉氏家傳》**涼藥** 小兒大人皆可服方。

甘草(炙) 黃 防風 越桃仁(山梔是。等分)

上末之。每服一大錢，水一盞，煎七分，量大小加減服。

《劉氏家傳》治熱竹茹飲方

人參 白朮(微炒) 茯苓 乾葛 麻黃(去根節, 酒浸, 熬。各等分) 甘草(減半, 半生用, 半熟用) 麥門冬(去心, 如甘草炙)

上末之。量大小每服半錢、一錢、二錢。竹茹多於藥, 水半盞, 同煎至四分。如小兒未能飲, 可與乳母吃, 只作銼散佳。如不甚熱, 則不用麥門冬。

《張氏家傳》治大人、小兒心臟實熱。牛黃散方

甘草(二兩, 炙) 鬱金(一兩, 炮) 馬牙硝(半兩) 朱砂(二錢)

上件搗, 羅為細末, 衰拌令勻。每服一錢或半錢, 臨臥時新汲水調下。

《張氏家傳》朱砂散 治小兒實熱方。

大黃(三錢, 半炒半生) 防風 甘草(炙。各二錢)

上為末, 外研入礬砂半錢, 再令勻。如大故熱, 小便赤, 大便澀。每服半錢一字, 一字入朱砂末子, 大小加減, 薄荷湯調下, 服了並不得吃一物, 令睡, 食後服。

《莊氏家傳》治小兒心臟熱。牛黃膏方

牛黃 腦麝(各少許) 馬牙硝 甘草(炙) 雄黃(漿水煮。各半兩) 川大黃 鬱金(各一兩, 並漿水煮)

上件八味, 內三味用漿水一升煮至三分之二, 出晒乾, 入餘藥一處研如面, 煉蜜為丸, 丸如綠豆大。每服三丸, 新水磨下, 量兒小大與之。

《孔氏家傳》治小兒熱, 只吃調胃承氣湯極妙。李使家只用此藥。才有熱, 量虛實與之, 勝如與他藥, 最效(方見傷寒卷中)

《王氏手集》心臟實熱, 安魂定魄。紫霜散子

朱砂(一兩半) 鐵粉(半兩) 鉛白霜 天竺黃 甘草(炙) 人參 使君子(各一錢) 腦子(半錢, 研入)

上為末, 以瓷器盛。每服半錢, 蜜水調下。

《吉氏家傳》治諸熱金花散方

人參 茯苓 朱砂(各一錢) 白附子 大黃(炒。各一分) 蟬蛻(五個) 蠍(二個) 甘草(半兩) 僵蠶(七個) 鬱金(半兩, 皂角水一碗, 煮乾為度)

上件為末。小兒風熱、疳熱、膈熱、赤眼口瘡用三服, 荊芥薄荷湯調下, 米飲亦得。如不思食, 以人參湯下。驚熱, 金銀薄荷湯下。

《吉氏家傳》金華散 退小兒一切風、實熱、潮熱方。

鬱金(皂角水煮) 天竺黃(各一錢) 牙硝() 甘草(炒。各一錢) 朱砂(一錢半)

上為細末。每服半錢或一字, 薄荷蜜水調下。

《千金翼》**七水凌** 主大熱及金石發動，金石凌不利；及小兒發熱者服之方。

朴硝 鹵鹹(如凌者。各五斤) 芒硝(三斤，如雪者) 滑石(一斤半) 玉泉石 石膏 凝水石(如雪者。各一斤)

上七味各別搗，粗篩。

凍凌水 寒泉水(各五升) 霜水 雪水 雨水(各一升) 露水 東流水(各五升半)

上七味澄令清，銅器中內上件七味散，極微火煎取七升，一宿澄清，內瓷罇中，淨處貯之。以重帛系口一百二十日，皆如凍凌狀，成如白石英，有八棱成就，或大如箸，有長一尺者，名曰七水凌。有人服金石發熱者，以井華水和五分，分服之。一服極熱即定。傷寒發熱一刀圭；小兒發熱與麻子許。不可多用，神驗。買藥不得爭價，皆上好者合藥，以臘月臘日為上。合時以清淨處，先齋七日，不履穢污、喪孝、產婦之家及不得令雞犬六畜，產婦、六根不全具及多口饒言人見之。不信敬人，勿與服之。服藥得熱退之後七日，乃慎酒肉五辛，勿複喜惡口刑罰。仍七日齋戒，持心清淨。

《千金翼》**紫雪** 主腳氣毒遍內外，煩熱、口生瘡，狂叫走及解諸石草熱藥毒發，卒熱黃等，瘴疫毒最良方。

通治老小熱毒。

金(一斤) 寒水石 石膏 磁石(各三斤，並碎)

上四味，以水一石，煮取四斗，去滓，內後藥。

升麻(一升) 元參(一升) 羚羊角(屑) 青木香 犀角(屑) 沉香(各五兩) 丁香(四兩) 甘草(八兩，炙) 上八味 咀，於汁中煮一斗，去滓；內硝石四升，朴硝精者四升，於汁中煎取七升。投木器中，朱砂粉三兩，麝香粉半兩，攪令相得，寒之二日，成於霜雪紫色。強人服三分，分服之。當利熱毒，老小以意增減。

用之一劑，可十年用之。

《千金翼》**元霜** 主熱風、熱氣、熱瘴、熱癰，惡瘡，毒內入攻心，熱悶，服諸石藥發動；天行時氣，溫疫熱入腑臟，變成黃膽；蛇螫、虎噬、狐野狼毒所咬，毒瓦斯入腹內攻，心熱。須利病出，用水三、四合，和一小兩，攪令消，服之兩次久，當快利兩行即瘥。小兒熱病，服棗許大，即瘥方。

金(五十兩) 磁石(三斤，碎) 石膏(五斤，碎) 寒水石(六斤，研如粉)

上四味以兩斛水煮取六斗，澄清。

升麻 元參(各一斤) 羚羊角(八兩) 犀角 青木香(各四兩) 沉香(五兩?)

上六味□A細切，內上件汁中，煮取二斗，澄清。

朴硝(末) 芒硝(各六升) 麝香(一兩，後入)

上三味內汁中漬一宿，澄取清，銅器中微微火煎，取一斗二升，以匙抄看凝即成，下經一宿，當凝為雪巴黑耳。若猶濕者，安布上日乾之。其下水更煎，水凝即可停之。如初畢，密器貯之。此藥無毒。又主毒風、腳氣、熱悶赤熱腫、身上熱瘡，水漬少許，綿貼取，點上即瘥。頻與兩服。病膈上熱，食後服；膈下熱，空腹服之。卒熱淋，大小便不通，服一、兩丸。有患熱者，皆宜服之。

《聖惠》：夫小兒多涎者，是風熱壅結，在於脾臟，積聚成涎也。若涎多即乳食不下，涎沫結實而生壯熱也。

錢乙論熱不可下云：朱監簿子五歲，夜發熱，曉即如故。眾醫有作傷寒者，有作熱治者，以涼藥解之不愈。其候多涎而喜睡，他醫以鐵粉丸下涎，其病益甚，至五日大引飲。錢氏曰：不可下之。乃取白朮散（方見胃氣不和門中）末一兩，煎藥汁三升，使任其意取足服。朱生曰：飲多不作瀉否？錢曰：無生水不能作瀉，縱瀉不足怪也，但不可下耳。朱生曰：先治何病？錢曰：止瀉、治痰、退熱、清神皆此藥也。至晚服盡，錢看之曰：更可服三升。又煎白朮散三升，服盡得稍愈。第三日又服白朮散三升，其子不渴無涎，又投阿膠散二服而安（阿膠散方見喘嗽上氣門中。）

錢乙附方：治小兒驚風，痰熱堅癖，能不用水銀、輕粉甚便。如不得已用之，僅去疾即止。蓋腸胃易傷，亦損口齒。

《五關貫真珠囊》：小兒疾飲，喉水食停積胸膈，結聚成痰。痰多則乳食不下，吐涎壯熱，熱不止即發驚癇。

《圖經》云：薄荷治小兒風涎，為要切之藥。

《仙人水鑿》青虛丸 治陽實涎盛，膈不利，小兒驚風涎盛；伏一切暑毒，鎮心祛邪，定恍惚方。

沒藥 青黛 鉛白霜 連珠紫甘遂（微炒）膩粉（各三錢）生龍腦（二錢）水銀（半兩，黑鉛半兩，如常法結成砂子。每用三皂子大）

上七味，合研勻，水煮薄糊為丸如梧桐子大。每服一丸至二丸。熱極，以麥門冬、龍腦冷熱水化下，大燥，生揉薄荷自然汁，入龍腦化下；伏一切暑毒，新汲水入龍腦化下；小兒驚風，金銀薄荷冷湯，入龍腦化下一丸。

《聖惠》治小兒脾風多涎，心胸壅悶，不下乳食，昏昏多睡。鉛霜散方

鉛霜 牛黃 龍腦（各細研）半夏（湯浸七遍去滑。各半分）白附子（炮裂）馬牙硝 防風（去蘆頭）朱砂 天竺黃（各細研）犀角（屑）細辛 黃芩 甘草（炙微赤，銼。各五分）

上件藥搗，細羅為散，入研了藥令勻。不計時候，用薑蜜溫水調下一字。更量兒大小以意加減。

《聖惠》治小兒脾肺風熱，膈上多涎，心神昏悶，少欲乳食。防風散方

防風 人參（各去蘆頭）羚羊角（屑）甘草（炙微赤，銼）枳殼（麩炒微黃，去瓢）黃芩（各一分）半夏（半分，湯洗七遍，去滑）

上件藥搗，粗為散。每服一錢，以水一小盞，入生薑少許，煎至五分，去滓。不計時候，量兒大小加減溫服。

《聖惠》治小兒心脾壅熱多涎。牛蒡子散方

牛蒡子 梔子仁 甘草(微炙赤, 銼) 川硝 鬱金(各半兩) 枳殼(一分, 麩炒微黃, 去瓢)
上件藥搗, 細羅為散。入龍腦半錢, 同研令勻。不計時候, 用薄荷水調下半錢。量兒大小加減服之。

《聖惠》治小兒脾熱, 乳食不下, 胸膈多涎。**半夏丸方**

半夏(半分, 生薑湯洗七遍, 去滑) 皂角子仁(半兩)
上件藥搗, 羅為末, 用生薑汁和丸如麻子大。不計時候, 以溫水下三丸。隨兒大小, 以意加減。

《聖惠》又方
上取東行牛口中沫, 塗於兒口內效。

《聖惠》又方
上取白羊糞少許, 入水研取汁, 塗兒口中效。

《聖惠》又方
上取鹿角末, 炒令焦, 更研令細, 以清粥飲調下一字。

《聖惠》又方
上取牛 草絞取汁, 少少與服之。

《博濟方》治上焦風壅, 化痰涎, 利胸膈, 逐風秘。**白龍丹**

雷丸(末, 二錢) 甘遂(末, 三錢) 龍腦(少許) 牽牛(一兩, 杵取末六錢, 不用再羅者) 粉霜 輕粉(各四錢, 入白面少許, 三味同研令勻細, 滴水和作餅子, 於慢火煨令熟, 放冷再研令細)
上件同為細末, 研令勻, 入青州棗煮熟, 取肉和為丸如綠豆大。每服五、七丸, 溫漿水下。如一切風癩驚搐涎滯, 並以漿水下七丸及至十丸。如小兒痰熱及渴不止, 頭疼, 但頻少與服, 自然消痰。大人風氣壅盛, 上焦不利, 最宜服此。更在臨時酌其加減。

太醫局 **水銀扁丸子** 治小兒驚風壯熱, 涎盛喘粗, 或發搐搦, 目睛上視, 及因乳哺不節, 胸滿嘔逆, 精神迷悶, 發癩蝨, 並宜服之。

水銀 黑鉛(同與水銀結砂子) 巴豆(去皮心, 酸醋煮令黃。各一兩) 膩粉 乾蠍(全者) 鉛白霜 青黛 百草霜 牛黃(四味研。各一分) 香墨(燒淬, 三錢) 黃明膠(炙令黃燥, 一錢三字)
上為細末, 入研藥勻。以陳粟米飯為丸如綠豆大, 捏扁。每一歲兒服一丸, 二歲服二丸, 三歲服三丸, 四歲以上服四丸, 用乾柿湯下, 薄荷湯亦得。更量虛實加減服, 利下青粘滑涎為度, 乳食後服此藥, 不得化破。

太醫局 **比金丸** 治小兒驚風體熱, 喘粗涎嗽, 心忪頰赤, 大小便不利, 夜臥不穩方。

膩粉(研) 滑石(各十五兩) 青黛(研, 二兩半) 天南星(炮, 十二兩半) 巴豆(去皮取霜, 七百個)
上為細末, 以麵糊為丸如麻子大。每服一歲一丸, 薄荷溫水下。如急驚風, 頭熱足冷, 口噤面青, 筋脈抽掣, 上膈頑涎, 疾狀甚者, 加一、兩丸, 煎桃符湯下。疏利下蘊毒熱涎, 立便安愈。小兒瘡疹後餘毒不解, 尤宜與服, 食後。

太醫局 靈砂歸命丹 治小兒蘊積邪熱，潮熱不除，頰赤口乾，心膈煩躁，痰涎不利，睡臥不安。或發驚癇，涎潮搐搦；又療積滯不消，下利多日，腹中痛，煩渴嘔噦，服藥調和不能愈者，並可服之。上以妙香丸一丸，分作五十丸。每服二丸，金銀薄荷湯下，更量歲數加減。如驚癇搐搦，龍腦膩粉蜜湯下。欲服此藥先效尤速，以冷水浸少時服之。（妙香丸方見積熱門。）

《譚氏殊聖》治小兒驚悸心忪，化涎痰，利胸膈煩熱，止咳嗽。金珠丸方

天南星(炮) 白礬(焙) 半夏(湯浸七遍) 朱砂(研細。各半兩) 人參乾山藥(各一錢) 膩粉(二錢) 金箔(十片)

上為細末，薄荷汁同水打糊為丸如綠豆大，金箔為衣。每服一丸，食後生薑湯下，量力服。

錢乙褊銀丸 治風涎膈實，上熱及乳不消，腹脹喘粗等方。

巴豆(去皮心、油膜，研細) 水銀(各半兩) 黑鉛(二錢半，同水銀結砂子) 麝香(半錢，別研) 好墨(八錢，研)

上將巴豆末並墨再研勻，和入砂子、麝香，陳米粥和丸如綠豆大，捏扁。一歲一丸，二、三歲二、三丸，五歲以上五、六丸，煎薄荷湯放冷送下，不得化破。更量虛實增減，並食後。

錢乙三聖丸 化痰涎，寬膈，消乳癖，化驚風，食癇諸疳。小兒一歲以裡，常服極妙方。

小青丸

青黛(一分) 牽牛(末，三分) 膩粉(一錢)
並研勻，麵糊丸，黍米大。

小紅丸

天南星(末，一兩，生) 朱砂(半兩，研) 巴豆(一錢，取霜)
並研勻，薑汁麵糊丸，黍米大。

小黃丸

半夏(生，末，一分) 巴豆(霜，一字七) 黃柏(末，半字七)
並研勻，薑汁麵糊丸，黍米大。
以上百日者各一丸；一者各二丸，隨乳下。

錢乙鐵粉丸 治涎盛潮搐吐逆方。

水銀砂子(二分) 朱砂 鐵粉(各一分) 輕粉(二錢) 天南星(炮裂，去皮臍，取末一分)
上同研水銀星盡為度，薑汁麵糊丸粟米大。煎生薑湯下十丸至十五丸，二、三十丸，無時。

錢乙銀液丸 治驚熱，膈實嘔吐，上盛涎熱。

水銀(半兩) 天南星(二錢，炮) 白附子(一錢，炮)
上為末，用石腦油為膏。每服一皂子大，薄荷湯化下。

長沙醫者鄭愈傳小兒利膈下涎，去心胸噎塞不止，並咳嗽。**神白丸方**

天南星 半夏(湯洗七遍，各半兩) 白僵蠶 白礬(生用。各七分)

上件為末，用杏仁七個去皮尖，巴豆一粒，同研勻，再用去皮生薑汁為丸如梧桐子大，陰乾。每服五丸，暴嗽生薑湯吞下；久嗽嚼胡桃肉、黃蠟各少許吞下。